



Daniel Telli ed Anna-Alice Dazzi preschentan il Pledari Grond online ch'è vegnì optimà per tablet e smartphone.

MAD

Il Pledari Grond online: nov ed interactiv

■ (Ir) Il dicziunari online rumantsch Pledari Grond da la Lia Rumantscha (LR) ha in nov design. Quel pussibilitescha ina tshertga immediata pli sperta e promova anc pli ferm il contact interactiv tranter ils utilisaders e la redacziun. Il Pledari Grond online cuntogna actualmain radund 219 000 entradaziuns en rumantsch grischun e tudestg. Quest dumber duai s'augmentar cuntinuamain. Era grazia als utilisaders. Quels han la pussaivladad da transmitter novas creaziuns da plects a la redacziun u da l'inditgar eventuals sbagls. Las midadas e cumplettaziuns èn immediat vesavilas per ils utilisaders suenter che la redacziun ha verificà ellas. Questa plattafurma promova anc pli ferm il contact

tranter la redacziun ed ils utilisaders. Lezs survegnan adina risposta sin dumondas linguisticas, tant davart il rumantsch grischun sco era davart ils idioms, sch'els inditgeschan lur adressa dad e-mail.

La tshertga immediata

La gronda differenza tranter la veglia versiun e la nova versiun è franc la tshertga immediata. Ils resultats per il pled tshertgà cumparan numnadamain gia durant scriver in pled. En pli è pussaivla ina tshertga pli detagliada.

Il dicziunari rumantsch è da nov concepì tenor la tecnologia dal responsive web design, pia da maniera ch'el identifitgescha l'apparat, sin il qual el vegn consultà e s'adatta mintgamai al visur correspondent, saja quai in compu-

ter persunal, in tablet u in smartphone.

Collavuraziun cun l'Universitad da Cologna

Remo Caminada ha creà il design grafic dal nov Pledari Grond online. Ed il team da l'elavuraziun d'infurmaziuns linguisticas da l'Universitad da Cologna, manà da Jürgen Rolshoven, ha sviluppà las funzionalitads ed è stà responsabel per la programmaziun da las datas. Il Pledari Grond online sa basa sin la banca da datas linguisticas da la Lia Rumantscha sviluppada il 1982 en connex cun la creaziun dal rumantsch grischun e cun ulteriuras mesiras da la planisaziun linguistica.

La porschida dal Pledari Grond online è vinavant gratuita ed accessibla sut www.pledarigrond.ch